

शूरवीर भोमियाजी भजन,

हे बीरा रे सिवरू देवी शारदा,
मै तो निव निव लागू पाव,
भोमियाजी शरणे थारी आवियो,
म्हारा पूर्ण किजो काम भोमियाजी,
संकट सगला ही मेट जो रे ॥

हे बीरा रे ऊंचो मन्दिर देवरों है कोई,
जगमग जागी ज्योत भोमियाजी रो,
परचो चारों ही खूट मे थारो,
नवखंड चावो है नाम भोमियाजी,
दर्शन म्हाने देवजो रे ॥

हे बीरा रे परचा जग में मोकला,
ज्यारो काई काई करा मै बखान,
भोमियाजी आंधा ने दे आँखीया,
एतो लूला ने देवे पाँव शूरमा,
याद करो उन वार मे रे ॥

हे शूरमा गाया लाया घेरने थेतो,
दिया मेणा ने मार भोम,
गद गद हो गई गुजरी ज्यारो,
दीनो कारज सवार भोमियाजी,

गुण गावा सब आपरा रे ॥

ओ भोमिया बांजन सिवरे आपने,
ज्याने देवो नैना बाल शूरमा,
घर बंधावो पालनो लेवो,
अबला ने सम्भाल शूरमा,
साचा जग रा देवता रे ॥

हे बीरा रे इन कलजुग रे मायने,
एतो प्रगट पूर्ण है देव भोमियाजी,
निर्धन सिवरे आपने ज्याने,
पल में करदे निहाल भोमियाजी,
सिवरू साचा ही देव ने रे ॥

ओ भोमियाजी घोडे चढेने आवजो,
थे तो हाथा रे तलवार शूरमा,
दुष्ट दलन थे आवजो पछे,
भगता ने लिजो ऊबार भोमियाजी,
मै तो सिवरू आपने रे ॥

हे शूरमा मेलो भरीजे आपरो कोई,
रूणगढ़ रे माय भोमियाजी,
दूरा देशारा जातरी कोई,
चरने शिश नवाय भोमियाजी,
दुखडा सबरा मेट जो रे ॥

हे भोमियाजी नोपत बाजे आपरे,
कोई झालर रो झनकार देवरा मे,
ढोल नगाडा बाजता रे,
थारे भोपा घूमे दरबार भोमियाजी,
छत्तर छाया थे राखजो ॥

हे शूरमा धड़ पूजीजे गोवा गाँव में,
थारो माथो रूणगढ़ माय भोमियाजी,
परचा जग में मोकला थारो,
घर घर गूजे जयकार भोमियाजी,
शरणे आयो री लजीया राखजो रे ॥

ओ भोमियाजी ताव बिमारी दूर करो,
थेतो दूर करो हर रोग भभूति,
जो कोई लगावे चाव सु,
जावे भूत डाकनीया दूर शूरमा,
जग में परचो आपरो रे ॥

ओ शूरमा दोय कर जोड्या आपने,
मै तो अरज करूँ अरदास,
भोमियाजी अर्जुन शरणे आवियो,
मापर किजो किरपा आप,
भोमियाजी गुण गावा मै आपरा रे ॥

गायक प्रकाश माली जी ।
प्रेषक मनीष सीरवी ।
(रायपुर जिला पाली राजस्थान)
9640557818

Source: <https://www.bharattemples.com/bhomiya-ji-bhajan/>



Bharat Temples

Complete Bhajans Collections - Download Free Android App

<https://play.google.com/store/apps/details?id=com.numetive.bhajans>

Facebook: <https://www.facebook.com/bharattemples/>

Telegram: <https://t.me/bharattemples>

Youtube: <https://www.youtube.com/channel/UC24oJCxZJyhhKzSUD-Lt9Tw>